



REPUBLIKA E SHQIPERISË  
Komisioneri për Mbrojtjen e të Dhënave Personale  
Komisioneri

Nr. 702/1 Prot

Tiranë, më 30, 3 2012

**Lënda :** Mbi kundërvajtjen administrative të kontrolluesit, “**Universiteti Elite**”  
**Tiranë.**

**VENDIM**

Nr. 08, datë 30/03 2012

Mbështetur në Ligjin nr. 9887, datë 10.03.2008 “Për Mbrojtjen e të Dhënave Personale”, Vendimet e Kuvendit të Shqipërisë nr. 211, datë 11.09.2008 “Për zgjedhjen e komisionerit për mbrojtjen e të dhënave personale” dhe nr 225, datë 13.11.2008 “Për miratimin e strukturës organike dhe kategorizimit të pozicioneve të punës të zyrës së Komisionerit për mbrojtjen e të dhënave personale”, pas shqyrtimit të materialit dhe mendimit paraprak të Drejtorisë së Inspektimit në ngarkim të kontrolluesit, “**Universiteti Elite**”, me adresë: Rruga “Irfan Tomini”, Nr. 27, pranë Akademisë Diplomatike, Tiranë.

**KONSTATOVA**

Sipas ligjit nr.9887, datë 10.03.2008 “*Për mbrojtjen e të dhënave personale*”, ju keni cilësinë e Kontrolluesit, pra përgjegjësinë për përpunimin e të dhënave personale dhe si i tillë keni detyrimin të zbatoni të gjitha kërkesat e këtij ligji dhe në mënyrë të veçantë të detyrimit të parashikuar në nenin 21 të tij.

Në pikën 1 të nenit 21 të ligjit të mësipërm parashikohet : “Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i qëllimit të përpunimit, të njoftuar më parë. Ndërsa në nenin 22 saktësohet përmbajtja e të dhënave që përpunoni, të cilat duhet t’i njoftoni tek Komisioneri.

Për zbatimin e këtij detyrimi nga ana jonë, me shkresën nr.3334 prot, datë 12.10.2011, ju është dërguar një informacion me shpjegimet se si do të plotësoni formularin e njoftimit të të dhënave personale që përpunoni, duke ju caktuar një afat për plotësimin e këtij detyrimi. Kjo shkresë është dërguar nëpërmjet shërbimit postar dhe rezultoi e kthyer nga kjo e fundit, në datën 12.10.2011 me shënimin: Administratorja refuzon marrjen në dorëzim të zarfit.

Gjatë kontrollit administrativ të realizuar pranë kontrolluesit në zbatim të urdhërit nr 48, datë 19.03.2012 të Komisionerit për Mbrojtjen e të Dhënave Personale u konstatua se:



Kontrolluesi, “**Universiteti Elite**“, Tiranë nuk ka kryer detyrimin ligjor për njoftim pranë Zyrës së Komisionerit për Mbrojtjen e të Dhënave Personale. Nuk është zbatuar, neni 21 i ligjit nr. 9887, datë 10.03.2008 “Për Mbrojtjen e të dhënave personale”.

Kjo, ju bë me dije edhe kontrolluesit nëpërmjet procesverbalit të datës 20.03.2012 të mbajtur në prani të tij.

Nga kontrolluesi nuk u provua në mënyrë bindëse që shkresa sensibilizuese e sipërcituar nuk është marrë në dorëzim. Gjithashtu, Shërbimi postar e ka kthyer me shkresën më shënimin që kontrolluesi ka refuzuar ta marrë në dorëzim shkresën. Pra, kontrolluesi ka refuzuar marrjen në dorëzim të shkresës vulnetarisht, duke mos marrë përsipër të njihet me përmbajtjen e shkresës dhe detyrimin ligjor.

Dërgimi i shkresës sensibilizuese nuk është një detyrim ligjor i Komisionerit për t’iu dërguar kontrolluesit. Edhe në kushtet e mosdërgimit të shkresës nga Komisioneri kontrolluesi në bazë të nenit 21 ka ligjërisht detyrimin për ta plotësuar Formularin e Njoftimit. Ligji nr. 9887, datë 10.03.2008 “Për Mbrojtjen e të dhënave personale” është ligj i cili është botuar në Fletore Zyrtare dhe me kalimin e afatit ligjor përkatës ligjërisht supozohet se është bërë i njohur për gjithë publikun dhe është ligjërisht i detyrueshëm për tu zbatuar nga të gjithë kontrolluesit, institucionet publike dhe private të cilëve iu drejtohet.

Nga miratimi i ligjit deri në momentin e këtij inspektimi administrativ ka kaluar një periudhë, relativisht e gjatë dhe kontrolluesi ka patur të gjithë kohën e nevojshme për tu njohur me ligjin dhe detyrimet ligjore të tij.

Në bazë të nenit 21 të ligjit nr. 9887, datë 10.03.2008 “Për Mbrojtjen e të dhënave personale”, “*...Çdo kontrollues duhet të njoftojë komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i qëllimit të përpunimit, të njoftuar më parë.*”

Gjithashtu, bazuar në nenin 25 të Ligjit, kontrolluesi nuk mund të fillojë përpunimin e të dhënave personale pa njoftuar më parë Zyrën e Komisionerit. Në këto kushte e konsiderojmë shkelje të rëndë përpunimin pa njoftuar e pa u regjistruar më parë në Regjistrin Qëndror të Subjekteve Kontrolluese, të administruar nga Zyra e Komisionerit. Fakti që bërja publike, bazuar në nenin 26/2 të Ligjit, është penguar për shkak të mos njoftimit të përpunimit/ve që kontrolluesi realizon, mund të ketë penguar referencat e mundshme që subjektet specifike që u përpunonohen të dhënat mund të kishin bërë te gjendja e përpunimit/ve që realizohen.

Mospërmbushja e këtij detyrimi ju ngarkon me përgjegjësi administrative të parashikuar në nenin 39 pika 1, gërma “d”, të ligjit nr.9887, datë 10.3.2008 “Për mbrojtjen e të dhënave personale”, ku parashikohet dënimi me gjobë nga 10.000 deri në 50.000 lekë.

Për zgjedhjen e masës së gjobës Komisioneri ka parasysh shkallën e njohjes dhe masat që keni marrë për implementimin e Ligjit Nr.9887, datë 10.03.2008 “Për mbrojtjen e të dhënave personale”.

Nisur sa më sipër, në zbatim të neneve 21-23, 30/2, 39/1,4; 40 e 41, të Ligjit nr.9887, datë 10.03.2008 “Për Mbrojtjen e të Dhënave Personale”, neneve 107-109 të K.Pr.Administrative dhe Nenit 18/a, c të Ligjit Nr. 10279, datë 20.05.2010 “Për Kundërvajtjet Administrative”:

## VENDOSA

1. Dënimin e Kontrolluesit, me gjobë 40.000 (dyzetmijë) lekë për mosplotësimin e detyrimit për njoftim sipas nenit 21 të Ligjit Nr. 9887, datë 10.03.2008 "Për Mbrojtjen e të Dhënave Personale".
2. Plotësimi i detyrimit për të njoftuar Zyrën e Komisionerit, të kryhet brenda një afati kohor prej 7 (shtatë) ditësh.
3. Gjoha arkëtohet nga kundërvajtësi në Buxhetin e Shtetit, jo më vonë se 30 ditë nga komunikimi i këtij vendimi. Me kalimin e këtij afati, ky vendim shndërrohet në titull ekzekutiv dhe ekzekutohet në mënyrë të detyrueshme nga Zyra e Përmbarimit.
4. Kundër këtij vendimi mund të bëhet ankim në Gjykatën e Rrethit Gjyqësor Tiranë, brenda 30 ditëve nga data e njoftimit.

**KOMISIONERI**

**Flora ÇABEJ (Pogaçe)**

